

四庫全書

史部

欽定四庫全書

史部

遼史拾遺卷十七

十八

詳校官庶吉士臣瑚圖禮

總校官庶吉士臣何思鈞

校對官助教臣羅萬選

校對官助教臣胡予襄

謄錄監生臣趙興文

謄錄監生臣李種

欽定四庫全書

遼史拾遺卷十七

錢塘厲鶚 撰

表第一

世表

開皇末別部四千餘戶達突厥來降

冊府元龜曰開皇四年五月契丹王美佛赫遣使請

降拜大將軍

靺鞨地

路振九國志曰靺鞨代居遼澤之中潢水南岸南距榆關一千一百里榆關南距幽州七百里

開元二年盡忠從父弟舍瑄率部落歸唐四年與奚長李大酺偕來詔復置松漠府以舍瑄為都督封松漠郡王

冊府元龜曰開元四年八月靺鞨李舍瑄奚李大酺各以所部來降制曰混一六合紀綱四海開物所以

苞舉華夷列爵所以範圍中外契丹松漠州都督李  
含璋奚李大酺等並材雄劒騎家襲簪組翻飛涿鹿  
之郊高視無間之地往屬詿惑遂爾携離海表為虞  
在苞桑之厚戒彙征順命乃連茹而同歸柔懷有章  
寵渥期在俾侯利建宜膺胙土之榮上將師貞仍允  
齋壇之拜含璋可封松漠郡王食邑三千戶行左金  
吾衛大將軍大酺可封饒樂郡王食邑三千戶行右  
金吾衛大將軍並員外置餘如故

五年以楊氏為永樂公主下嫁舍瑋

冊府元龜曰開元五年八月詔曰故東平王外孫正  
議大夫復州司馬楊元嗣第七女譽叶才明體光柔  
順葭莩懿戚敦睦有倫舜華靡顏德容兼茂屬賢王  
慕義予以賜親納女問名茲焉迨吉宜昇外館之寵  
俾耀遑城之地可封永樂公主出降契丹松漠郡王  
李含瑋婚之夜遣諸親高品及兩蕃太守領觀花燭  
開元十年裕允入朝以慕容氏為燕郡公主下嫁裕允

冊府元龜曰開元十年契丹松漠郡王裕允入朝請  
婚帝令慕容嘉賓女封燕郡公主以妻之

實古托允之弟國人共立之開元十三年冬朝于行在  
從封禪泰山改封廣化郡王以陳氏為東光公主下嫁  
實古

冊府元龜曰開元十三年契丹立李盡忠弟實古為  
主其冬車駕東巡實古詣行在所改封廣化郡王封  
皇從外甥女陳氏為東光公主以妻之制曰李邵固輸

忠保塞乃誠奉國屬升中于天無遠而不屆華裔靡  
隔等數有加宣錫休名俾承慶澤

達呼哩氏阿庸于奚王以通于唐朝貢歲至

劉昫舊唐書曰天寶十二年契丹降附迄于貞元常  
間歲來修藩禮貞元十四年與奚衆同寇我振武大  
掠人畜而去九年十年復遣使來朝大首領悔落拽  
河已下各授官放還十一年大首領伊蘇等二十五  
人來朝自後至元和長慶寶厯太和開成時遣使來



朝貢

李懷秀唐賜姓名契丹名達年扎里本八部大帥天寶四年降唐拜松漠都督

冊府元龜曰天寶四載封外甥女獨孤氏為靜樂公主降松漠都督崇順王李懷節九月契丹首領殺公主舉部以叛 鶚案懷秀懷節名不同未知孰是

且羅以唐封恭仁王代松漠都督遂稱契丹王

冊府元龜曰天寶五載四月封契丹王楷維為恭仁王

仍授松漠府都督

契丹王欽德實埒之族也先是為哈陶津汧光啟中抄掠奚室韋諸部皆服役之數與劉仁恭相攻晚年政衰八部大人法常三歲代德埒勒部耶律安巴堅建旗鼓自為一部不肯受代自號為王盡有契丹國約尼氏遂亡蘇逢吉漢高祖實錄曰契丹本姓達呼哩氏後分八族一曰達爾扎邸二曰伊斯琿邸三曰舍琿四曰諾爾威邸五曰頗摩六曰訥古濟邸七曰濟勒勤八曰實裏

郎管縣四十一縣有令八族之長皆號大人稱刺史  
常推一人為王建旗鼓以稟之每三年第其名以相  
代 賈緯備史曰後唐武皇會安巴堅故雲州城結  
以兄弟之好時列兵相去五里使人持盃往來以展  
酬酢之禮安巴堅喜謂武皇曰我蕃中首領舊法三  
年則罷若他日見公復相禮否武皇曰我受朝命鎮  
太原亦有遷移之制但不受代則可何憂罷乎安巴  
堅由此用其教不受諸族之代 唐莊宗列傳曰咸通

末契丹王曰實埒疆土稍大累來朝貢光啟中其王  
曰欽德乘中原多故北邊無備遂蠶食諸部達靼奚  
室韋之屬咸被驅役及欽德政衰安巴堅族盛自稱  
國王

表第二

皇子表

德祖六子埒克字綏蘭第二與弟特爾格安圖等反太  
祖念其同氣不忍加刑杖而釋之神冊二年南奔

資治通鑑曰契丹主之弟薩喇阿巴即埒克號北大王  
謀亂于其國契丹王數之曰汝與吾如手足而汝興  
此心我若殺汝則與汝何異乃囚之期年而釋之薩  
喇阿巴帥其衆奔晉晉王厚遇之養為假子仕為刺  
史胡柳之戰以其妻子奔梁同光元年唐帝滅梁詔  
敬翔李振首佐朱溫共傾唐祚契丹薩喇阿巴叛兄  
棄母負恩背國宜與趙巖等並族誅于市

太宗五子雅斯哈第二景宗封齊王保寧四年病疽薨

續資治通鑑長編曰契丹供奉官李信來歸言國中  
事云景宗后蕭有姊二人長適齊王王死自稱齊妃  
領兵三萬屯西鄙驢駒兒河嘗閱馬見蕃奴達蘭阿  
布姿貌甚美因召侍帳中蕭氏聞之繫達蘭阿布  
以沙囊四百而離之踰年齊妃請于蕭氏願以為夫  
蕭氏許之使西得達靺盡降之因謀帥其衆奔庫爾  
哲國結兵以篡蕭氏蕭氏知之遂奪其兵命領幽州  
景宗四子隆慶字燕隱小字普賢奴第二

契丹國志曰皇太弟隆慶生而岐嶷幼與羣兒戲為行伍戰陣之法指揮意氣無敢違者景宗奇之曰此吾家生馬駒也

隆祐小字果勒齊一字和爾沁第三統和中伐宋留守京師

契丹國志曰齊國王隆祐性沈毅美姿容自少慕道後為東京留守別置道院延接道流誦經宣醮用素饌薦獻

藥師努第四早卒堊王子院

續資治通鑑長編曰契丹供奉官李信云景宗四子  
長名隆緒即遼主次名贊封梁王次名果勒齊封吳  
王次哲格八月而夭

表第三

公主表

太祖女濟古爾下嫁淳欽皇后弟蕭舒魯幼為奧姑契  
丹故俗凡婚燕之禮推女子之可尊敬者坐于奧謂之



與姑未封而卒

契丹國志曰舒魯姓蕭氏乃太祖皇后兄也蕃部人  
世為首領少壯武有膽略部人憚之從太祖平奚有  
功授統軍使盧文進自新州來奔太祖歲入燕塞舒  
魯以兵從又從圍周德威于幽州城幾克會救至退  
師改授奚王府監軍東路兵馬都統軍于庫哩尚與  
姑公主

景宗四女淑格第四無封號與駙馬都尉盧俊不諧表

請離婚改適蕭實納

十國春秋曰盧俊尚北漢公主為駙馬都尉廣運三年宋師壓境俊詣遼乞師有功白馬嶺之役遼相耶律沙將趨太原會俊以國亡出奔言太原已陷遂勒兵還俊至遼署同政事門下平章事明年遼景宗以公主淑格下嫁俊復拜駙馬都尉久之與淑格不協詔離之改適蕭實納遂出俊為興國軍節度使終于其國

聖宗十四女巴格第九封同昌縣主進封公主下嫁劉  
三嘏

儒林公議曰契丹有幽薊雁門以北亦開選舉以收  
士人幽州劉氏兄弟其名曰二元三嘏四端五常六  
符皆在被遇三嘏四端復尚主慶厯中三嘏携嬖妾  
偕一子投廣信軍自言主兇狠必欲殺其妾與子故  
歸朝廷頗詢其國中機事復為詩以自陳云雖慙涖  
勺赴滄溟仰訴丹衷不為名寅分星辰將降禍兌方疆

寓即交兵春秋大義惟觀釁王者雄師但有征救取  
燕民歸舊主免于北國歲稱兄朝廷以誓約既久納  
之生釁遽又移文逐郡躡知三墩未還求索峻切期  
于必得不然則舉兵隳好矣朝廷乃遣還三墩復由  
西山路入定州境所至以金賂村民求宿食勢亦窘  
迫定師遣人搜索拘送比三墩至幽州其妻已先在  
矣乃殺其妾與子械送三墩以其兄弟皆方委任遂  
貸三墩死使人監錮之 鶚案劉六符傳云三墩與

公主不諧奔宋歸殺之當以史為正

天祚六女文妃生一女額哩音為金人所執

張滙金節要曰二太子

即幹里雅布

之妻約尼公主乃遼主

天祚之女鶚案金史曰宗望

即幹里雅布

襲遼主于陰山青

塚之間直至遼主營時遼主往應州其嬪御諸女皆

在見敵兵奄至驚駭欲奔命騎下執之有頃後軍至

遼太叔和勒溫妃國王納哩次妃遼漢夫人并其子

秦王許王女古雲額哩音大阿雅小阿雅趙王妃額

爾琿招討達魯詳袞魯沁節度博迪齊格爾皆降太祖嘉宗望功以遼蜀國公主額哩音賜之

表第四

皇族表

魏國王察克系出景宗孝成康靖皇帝

契丹國志曰宗懿番名察克濟

即察克

聖宗皇帝太弟

隆慶之子也少有氣局幹畧過人聖宗推愛諸姪每誡之曰汝勿以材能陵物勿以富貴驕人惟忠惟孝

保身保家始封中山王歷龍化州饒建宜平州節度  
使改封晉王薨

秦晉國王淳稱帝系出興宗神聖孝章皇帝

三朝北盟會編曰秦晉國王淳興宗之孫道宗之弟  
于天祚為從叔初道宗囚其子濬欲立淳為儲貳不  
果已而立天祚淳守燕十二年得人心號燕王又謂  
九大王又謂覃湘大王

表第五

外戚表

大同元年太宗自汴將還留外戚小漢為汴州節度使  
賜姓名曰蕭翰

契丹國志曰蕭翰契丹之大族其號阿巴翰之妹本  
無姓氏契丹呼翰為國舅及將以為節度使李崧為  
制姓名曰蕭翰于是始姓蕭

北府宰相阿古濟

冊府元龜曰莊宗同光初滄州奏偵契丹國舅色哩



貢送羊馬于幽州申和好二年八月幽州進契丹國  
舅薩喇宴書 鶚案後唐同光初為遼太祖天贊初  
是時淳欽皇后弟蕭阿古濟為北府宰相畧地燕趙  
所云色哩貢疑即阿古濟本傳云字薩巴

表第六

游幸表

太宗天顯九年五月射柳 穆宗應歷六年九月擊鞠  
鶚案金史禮志曰射柳擊球之戲亦遼俗也金因尚

之凡重五日拜天禮畢插柳球場為兩行當射者以

尊卑序各以帕識其枝去地約

一作凡

數寸削其皮而

白之先以一人馳馬前導後馳馬以無羽橫鏃箭射之既斷柳又以手接而馳去者為上斷而不能接去者次之或斷其青處及中而不能斷與不能中者為負每射必伐鼓以助其氣已而擊球各乘所常習馬持鞠杖杖長數尺其端如偃月分其衆為兩隊各爭擊一球先于球場南立雙桓置板下開一孔為門而

加網為囊能奪得鞠擊入網囊者為勝或曰兩端對立二門互相排擊各以出門為勝球狀小如拳以輕韌木枵其中而朱之皆所以習驍捷也既畢賜宴歲以為常

聖宗統和十一年正月辛延芳淀

徐昌祚燕山叢錄曰遼縣西有延芳淀大數頃中饒荷芰水鳥羣集其中遼時每季春必來弋獵打鼓驚天鵝飛起縱海東青擒之得一頭鵝左右皆呼萬歲

海東青大僅如鵲既縱直上青冥幾不可見俟天鵝  
至半空歛自上而下以爪攫其首天鵝驚鳴相持殞  
地

興宗重熙十一年十二月幸延壽寺飯僧

松漠紀聞曰燕京蘭若相望大者三十有六然皆律  
院自南僧至始立四禪寺曰大覺招提竹林瑞像延  
壽院主有質坊二十八所僧職有正副判錄或呼司  
空

道宗清寧十年九月幸七金山三學寺

耶律楚材湛然居士集曰三學寺改名圓明請予為  
功德主因作疏曰粵三學之巨剎冠四海之名藍今  
改僧而舍尼遂從禪而革律邀印公為粥飯頭請湛  
然作功德主 張翥蛻菴集游城南三學寺詩曰城  
南多佛剎結構自遼金旁舍遺民在殘碑好事尋雨  
苔塵壁暗風葉石幢深一飯蒲團了蕭蕭鐘磬音

鶚案興宗紀重熙十一年十二月以宣獻皇后忌辰

上與皇太后素服飯僧于延壽憫忠三學三寺則寺  
在南京城南無疑但七金山不可考耳又案兵衛志  
云聖宗統和二十三年城七金山建大定府號中京  
則七金山在中京豈另有三學寺耶抑二事並書耶  
咸雍三年獵于赤山

張舜民使遼錄曰北地鵬巢中生獵犬極難得今駕  
前有二隻其性頗異每獵而獲十倍常犬北馬有割  
去肝者遂無病能行其法飲以酒醉于腋間破之取

去少肉然亦十喪八九 鶚案舜民使遠在道宗時  
故此條屬焉

表第七

部族表

太祖元年黑車子室韋八部降

杜佑通典曰室韋有五部後魏末通焉并在靺鞨之  
北路出柳城諸部不相總一所謂南室韋北室韋鉢  
室韋深末怛室韋大室韋竝無君長人衆貧弱突厥

沙鉢略可汗常以吐屯潘埏統領之蓋契丹之類也  
南室韋在契丹北三千里土地卑濕至夏則移向西  
北貨勃欠對二山多草木饒禽獸又多蚊蚋人皆巢  
居以避其患衣服與契丹同寢則屈木為室以蘆篠  
覆上移則載行以豬皮為席編木藉之氣候多寒田  
牧甚薄無羊少馬多豬牛造酒食噉言語與靺鞨同  
婚姻二家相許婿輒盜婦去然後送牛馬為聘婦人  
不再嫁以為死人妻難以共居部落共為一大棚人



死則置屍其上居喪三年自南室韋北行十一日至  
北室韋氣候最寒冬則入山居穴中牛畜多凍死俗  
皆捕貂為紫冠以狐貉衣以魚皮又北行千里至鉢  
室韋依胡布山而住用樺皮蓋屋從鉢室韋西四日  
行至深末怛室韋因水為號冬月穴居以避太陰之  
氣又西北數千里至大室韋逕路險阻言語不通尤  
多貂及青鼠後魏武定隋開皇大業中並遣使朝獻  
大唐所聞有九部焉屢有朝貢所謂嶺西室韋北室

韋黃頭室韋大如者室韋小如者室韋納婆葛室韋  
達未室韋駱駝室韋並在柳城郡之東北近者三千  
五百里遠者六千八百里 胡嶠陷北記曰黑車子  
善作車帳其人知孝義地貧無所產云契丹之先常  
役回紇後背之走黑車子始學作車帳 又曰一曰  
室韋二曰黃頭室韋三曰獸室韋其地多銅鐵金銀  
其人工巧銅鐵諸器皆精好善織毛錦地尤寒馬溺  
至地成冰堆 冊府元龜曰南室韋在契丹北三千

里分為二十五部每部有餘莫弗瞞咄猶酋長也北  
室韋在南室韋北行十一日其國分為九部落繞吐  
紇山而居其部落渠帥號乞引莫賀咄每部有莫何  
弗三人以貳之鉢室韋在北室韋北千里依胡布山  
而住人衆多於北室韋不知為幾部落大室韋在北  
室韋西北數千里 契丹國志曰室韋國室或為失  
契丹之類其在南者為契丹在北者號為室韋路出  
和龍北千餘里入契丹國與契丹同夏則城居冬逐

水草有南室韋北室韋其俗大夫皆披髮婦人皆盤髮衣服與契丹同乘牛車以簾篠為屋如輶車狀度水則束薪為筏或有以皮為舟者馬則織草為韉結繩為轡氣候多寒田牧甚薄惟射獵麋鹿為務食肉衣皮鑿冰沒水中而網取魚鼈地多積雪惧陷坑穿騎木而行太祖併諸蕃三十六國室韋在其中

聖宗統和十五年罷奚五部歲貢麋鹿

通典曰庫莫奚者其先東部鮮卑宇文之別種也初

為慕容皝所破遺落者竄匿松漠之間其俗甚不潔  
而好為寇抄後魏之初頻為寇盜及突厥興而臣屬  
之後稍漸強盛分為五部一曰蘇克二曰美佛赫三  
曰楚庫勒四曰穆昆五曰實德哩饒樂水北即鮮卑故  
地每部置森濟一人為帥隨逐水草頗同突厥有阿  
爾威氏五部中為盛諸部皆歸之其俗死者以葦箔裹  
屍懸之樹上其後款附至隋代號曰奚部落 五代  
會要曰奚本匈奴別種即東胡之地人物風俗與突

厥同有五部一曰阿爾威部管縣六二曰綽班部管縣  
四三曰安扎部管縣六四曰尼勒堅部管縣四五曰哈  
齊濟部管縣三每部有刺史每縣有令酋長號奚王  
唐制兼饒樂府都督居陰涼州東去營州五百里南  
去幽州九百里幽州置饒樂府長史一人監之後徙  
居琵琶川在幽州東北數百里出古北口地宜羊馬  
羊則純黑馬則前蹄堅善走以馳獵為務逐獸高山  
自下而上其勢若飛語與契丹小異爨以平底瓦鼎

煮糴為粥既飪以寒水解之而食每春借民之荒田種糶秋熟來獲畢則窖于山下人莫知其處自天祐初契丹兵力漸盛室韋奚靺皆受制焉故奚之部族為契丹代守境上暨後酷虐其首領庫春怨之以別部內附徙于媯州依北山而居漸有數千帳故有東西奚之號庫春卒其子薩喇代立後唐莊宗破幽州賜薩喇姓李名紹威至晉天福元年高祖以契丹有助立之功割雁門以北及幽州之地賂之繇是奚之

部族復隸于契丹開運三年十二月契丹犯闕其王  
伊剌以所部兵屯于洛陽及德光死隨衆北遁文  
獻通考曰紹威卒子伊剌立初紹威娶契丹女錫里  
哲伯埒之姨為妻後哲伯埒叛亡入西奚紹威納之  
晉高祖入立割幽州燕門以入于契丹是時紹威與  
哲伯埒皆已死德光已立晉北歸伊剌迎謁馬前德  
光曰非爾罪也負我者伊剌與哲伯埒爾乃發其墓  
粉其骨而颺之自去諸徙媯州自別為西奚而東奚



在琵琶川者亦為契丹所并不復能自見云

開泰元年哈斯罕大王和勒希來朝

松漠紀聞曰黃頭女真者皆山居號哈斯罕女真

哈斯

罕河西亦有之有八館在黃河東今皆屬金人與金粟城五花城隔河相近三城八館舊屬契丹今屬夏人金人約以兵取關中以三城八館報之後背約再取八館而三城在河西屢爭不得其一城忘其名

其人戇朴勇鷲不能別死生金人每出戰皆被以重札令前驅謂之硬軍疑即黃頭室韋也金國謂之黃頭生女真髭髮皆黃目睛多綠亦黃而白多因避契

丹諱遂稱黃頭女直

遼史拾遺卷十七

欽定四庫全書

遼史拾遺卷十八

錢塘厲鶚 撰

表第八

屬國表

渤海

文獻通考曰渤海本粟末靺鞨附高麗者姓大氏俗謂王曰可毒失對面呼聖王牋表呼基下梁開平元

年王大諲譔遣王子來貢方物天成元年遣使入貢  
進兒口女口先是契丹耶律安巴堅兵力雄盛東北  
諸蕃多臣屬之以渤海土地相接常有吞併之志是  
歲率諸蕃部攻渤海扶餘城下之後改扶餘城為東  
丹府命其子托雲留兵鎮之 松漠紀聞曰渤海國  
去燕京女真所部皆千五百里以石累城足東並海  
其王舊以大為姓右姓曰高楊張竇烏李不過數種  
部曲奴婢無姓者皆從其主婦人皆妬悍大氏與他

姓相結為十姊妹迭譏察其夫不容側室及他游聞  
則必謀寘毒死其所愛一夫有所犯而妻不之覺者  
九人則羣聚而詬之爭以嫉忌相誇故契丹女真諸  
國皆有女倡而其良人皆有小婦侍婢唯渤海無之  
男子多智謀饒勇出他國右至有三人渤海當一虎  
之語契丹安巴堅滅其主大誣誤徙其名帳千餘戶  
于燕給以田疇捐其賦入往來貿易關市皆不征有  
戰則用為前驅 契丹國志曰渤海螃蟹紅色大如

椀螯巨而厚其跪如中國蟹螯鮑魚之屬皆有也

回鶻

王溥唐會要曰貞元五年迴紇使李義進請因咸安公主下降改紇字為鶻字蓋欲誇國俗俊健如鶻也五代會要曰回鶻本牙在天德西北娑陵水上距長安六千九百里唐天寶中安祿山犯闕有助國之功累朝尚主自會昌初其國為黠戛斯所侵部族擾亂及移帳至天德振武間又為石雄劉沔所襲破之復

為幽州節度使張仲武所攻餘衆部曲奔歸於吐蕃  
吐蕃處之甘州其後時通中國世以中國為舅朝廷  
每賜書詔亦嘗以甥稱之 松漠紀聞曰回鶻自唐

末浸微甘涼瓜沙舊皆有族帳後悉羈縻于西夏唯  
居四郡外地者頗自為國有君長其人卷髮深目眉  
修而濃自眼睫而下多蚪髯土多瑟瑟珠玉帛有兜  
羅絲毛氍毹絨錦注絲熟綾斜褐藥有脰肭臍砂香  
乳香安息篤耨善造賓鐵刀劍烏金銀器多為商賈

于燕載以橐駝過夏地夏人率十而指一必得其最

上品者賈人苦之後以物美惡雜貯毛連中

毛連以羊毛緝

之單其中所頭為袋以毛繩或線封之有甚麗者有間以雜色毛者則輕細

然所征亦不

貲其來浸熟始厚賂稅吏密識其中下品者俾指之

尤能別珍寶蕃漢為市者非其人為僧則不能售價

奉釋氏最盛共為一堂塑佛像其中每齋必封羊或

酒酣以指染血塗佛口或捧其足而吮之謂為親敬

誦經則衣袈裟作西竺語燕人或俾之祈禱多驗婦



人類男子白皙著青衣如中國道服然以薄青紗裹首而見其面 契丹國志曰回鶻豆高二尺許直幹有葉無傍枝角長二尺每角止兩豆一根才六七角色黃味如栗

### 党項

冊府元龜曰党項其種有巖昌白銀狼東接臨洮西拒葉護南北數千里處山谷間每姓別為部落大者五千餘騎小者千餘騎 五代史曰党項西羌之遺

種其國在禹貢析支之地東至松州西接葉護南界  
春桑北鄰吐渾有地三千餘里無城邑而有室屋以  
毛罽覆之其人喜竊盜而多壽往往至百五六十歲  
其大姓有細封氏費聽氏析氏野利氏拓拔氏為最  
強

波斯國

唐會要曰波斯國在京師西萬五千里俗事天地日  
月水火諸神西域諸故事火祆者皆諸波斯受法焉

以六月一日為歲首地多名馬又多駿犬今所謂波斯犬也 冊府元龜曰波斯國其先有波斯匿王者子孫以王父字為氏因為國號

濊貊國

冊府元龜曰濊貊國南與辰韓北與高句麗沃沮接東窮大海朝鮮之東皆其地也

大食國

冊府元龜曰大食國在南海中其國男夫黑色多鬚

鼻長而大似婆羅門婦人白皙亦有文字出駝馬驢  
騾羖羊等其馬大于諸國兵刃勁利其俗勇于戰鬪  
合事天神而土多沙石不堪耕種惟食鳥獸等肉

日本國

文獻通考曰倭在帶方郡東南大海中大較在會稽  
東治之東與朱崖儋耳相近更號日本言國近日所  
出以為名宋雍熙元年本國僧裔然與其徒五人浮  
海而至獻銅器十餘事并本國職貢今年代紀各一

卷裔然書曰國中有五經及佛經白居易文集七十  
卷並得自中國土宜五穀而少麥交易用銅錢文曰  
乾文大寶畜有水牛驢羊多羣象產絲蠶多織絹薄  
緻可愛樂有中國高麗二部四時寒暑大類中國國  
之東境接海島夷人所居身面皆有毛東與州產黃  
金西別島出白銀以為貢賦國王以王為姓傳襲至  
今王六十四世文武寮吏皆世官

新羅國

契丹國志曰新羅國在高麗東本漢時樂浪地其言語名物有似中國人名國為邦弓為弧賊為寇行酒為行觴相呼皆為徒文字甲兵同于中國人選壯健者悉入軍每月旦相賀王設宴會班賚羣官大事則聚官詳議定之田甚良沃水陸兼種服色尚素婦人辮髮繞頭以雜綵及珠為飾婚嫁唯酒食而已輕重隨貧富 文獻通考曰新羅其先本辰韓種也辰韓始有六國稍分為十二新羅其一也

初曰斯盧或曰斯羅

其國在百濟東南五百餘里

亦在高麗東南兼有漢時樂浪郡之地 東

濱大海其人雜有華夏高麗百濟之屬兼有沃沮不耐韓濊之地後唐同光元年王金朴英遣使朝貢

### 吐蕃

冊府元龜曰吐蕃在長安之西八千里本漢西羌地也後魏神瑞初南涼禿髮樊尼率衆西奔濟黃河湔積石於羌中建國開地千里以禿髮為國號語訛謂之吐蕃其後子孫蕃昌又侵伐不息土宇漸廣唐高

宗時吐蕃盡收羊同党項及諸羌之地東與涼松茂  
嵩等州相接南至婆羅門西又攻陷龜茲疎勒四鎮  
北抵突厥地方萬餘里自漢魏以來西戎之盛未之  
有也 五代史曰吐蕃國地君世部族名號物俗見  
于唐著矣至五代時吐蕃已微弱回鶻党項諸羌夷  
分侵其地而不有其人民值中國衰亂不能無有惟  
甘涼瓜沙四川常自通于中國甘州為回鶻牙而涼  
瓜沙三州將吏猶稱唐官數來請命



沙陀突厥

冊府元龜曰沙陀突厥在甘州習俗左老右壯溷雜男女畧與吐蕃同其悍捷便弓馬勝之

靺鞨

五代史曰黑水靺鞨本號勿吉其國東至海南界高麗西接突厥北鄰室韋蓋肅慎氏之地也其衆分為數十部而黑水靺鞨最處其北尤勁悍無文字之記其兵尤尚弧矢

鐵驪

通典曰鐵勒之先匈奴之苗裔也種類衆多自西海之東依據山谷往往不絕並有君長屬東西兩突厥隨水草流移人性凶忍善于騎射貪婪尤甚以寇抄為生近西邊者頗為藝植多牛羊而少馬突厥國有東西征討皆資其用以制北荒十六國慕容垂時北塞後魏末河西並云有勒勒部鐵勒蓋言訛也 鶚案金史云鐵勒者古部族之號奚有其地號稱鐵勒

州又書作鐵驪州奚有五世族世與遼人為昏因附  
姓述律氏中

吐谷渾

會海菁華曰吐谷渾本遼東鮮卑也西晉時首帥徒  
何涉歸有二子長曰吐谷渾少曰若洛廐代統郡落  
別為慕容氏渾廐長廐正嫡父在時分七百戶與渾  
渾與廐二部俱牧馬馬鬬相傷渾擁馬西行乃附陰  
山屬永嘉之亂始度隴西止于抱罕而後子孫據有

甘松之南洮水之西南極于白蘭在益州西北有青海周迴千餘里海中有小山每冬冰合後以良牝馬置此山至來冬收之馬有孕所生得駒號曰龍種時稱青海驄焉至其孫葉延以禮云公孫之子得以王父字為氏吾祖始自昌黎先宅于此今以吐谷渾為氏尊祖之義也

吐渾

五代會要曰吐渾本吐谷渾也唐咸通中酋長有赫

連鐸者從太原節度使康承訓平徐方有功朝廷授  
振武節度使復盜據雲中後唐太祖逐之乃歸幽州  
李斥濤其部族散居蔚州界立為酋長有白承福者  
同光初代為都督依中山地石門為柵莊宗賜其額  
為寧朔奉化兩府以都督為節度使仍賜承福姓李  
名紹魯至晉高祖天福元年高祖以契丹助立之功  
割雁門以北及幽州之地以賂之繇是吐渾部族皆  
隸于契丹其後復為鎮州節度使安重榮所誘乃背

契丹率車帳羊馬取五臺路歸國契丹大怒以朝廷  
招納叛亡遣使責讓六年正月晉高祖命供奉官張  
澄率兵二千搜索并鎮忻代四州山谷吐渾還其舊  
地

突厥

胡嶠陷北記曰契丹西則突厥回紇西北至嫺厥律  
其人長大髦頭地苦寒水出大魚契丹仰食又多黑  
白黃貂鼠皮諸國皆仰之其人最勇鄰國不敢侵又

其西轄戛又其北單子突厥皆與嫗厥律略同冊  
府元龜曰突厥者蓋匈奴之別種居金山之陽金山  
形似兜鍪其俗謂兜鍪為突厥因以為號

沙州燉煌王曹壽沙州回鶻曹順

五代史曰沙州梁開平中有節度使張奉自號金山  
白衣天子至唐莊宗時回鶻來朝沙州留後曹義金  
亦遣使附回鶻以來莊宗拜義金為歸義軍節度使  
瓜沙等州觀察處置等使 文獻通考曰沙州留後

曹義金卒子元忠嗣宋興國五年元忠卒咸平四年  
封子延祿為譙郡王五年延祿為從子宗壽所害宗  
壽權知留後表求旌節乃授宗壽節度使子賢順為  
衙內都指揮使大中祥符末宗壽卒授賢順本軍節  
度 鶚案曹氏父子遼史去宗賢二字避廟諱也

于闐國

五代史曰于闐國去京師萬里外其國西南近蔥嶺  
與婆羅門為鄰國而相去猶三千里南接吐蕃西北



至疎勒二千餘里晉天福三年于闐國王李聖天遣  
使者馬繼榮來貢紅鹽鬱金犛牛尾牛氈等晉遣供  
奉官張匡鄴假鴻臚卿彰武軍節度判官高居誨為  
判官冊聖天為大寶于闐國王是歲冬十二月匡鄴  
等自靈州行二歲至于闐至七年冬乃還而居誨頗  
記其往復所見山川諸國而不能道聖天世次也居  
誨記曰自靈州過黃河行三十里始涉沙入党項界  
曰細腰沙神樹沙三公沙宿月支都督帳自此沙行

四百餘里至黑堡沙遂登沙嶺沙嶺党項牙也其酋  
曰捻崖天子渡白亭河至涼州自涼州西行五百里  
至甘州甘州回鶻牙也其南山百餘里漢小月支之  
故地也有別族號鹿角山沙陀云朱耶氏之遺族也  
自甘州西始涉磧磧無水載水以行甘州人教晉使  
者作馬蹄木澀木澀四竅馬蹄亦鑿四竅而綴之駝  
蹄則包以鼈牛皮乃可行西北五百里至肅州渡金  
河西百里出天門關又西百里出玉門關經吐蕃界

吐蕃男子冠中國帽婦人辮髮戴瑟瑟珠云珠之好者一珠易一良馬西至瓜州沙州二州多中國人聞晉使者來其刺史曹元忠等郊迎問使者天子起居瓜州南十里鳴沙山山冬夏殷殷有聲如雷云禹貢流沙也又東南十里三危山云三苗之所竄也其西渡都鄉河曰陽關沙州西曰仲雲其牙帳居胡盧磧云仲雲者小月支之遺種也其人勇而好戰瓜沙之人皆憚之胡盧磧漢明帝時征匈奴屯田于胡盧蓋

其地也地無水而常寒多雪每天暖雪消乃得水匡  
鄴等西行入仲雲界至大屯城仲雲遣宰相四人都  
督三十七人候晉使者匡鄴等以詔書慰諭之皆東  
向拜自仲雲界西始涉礧磧無水掘地得濕沙人置  
之甕以止渴又西渡陷河伐檉置水中乃渡不然則  
陷又西至紺州紺州于闐所置也在沙州西南去京  
師九千五百里矣又行二日至安軍州遂至于闐聖天  
衣冠如中國其殿皆東向曰天冊殿有樓曰七鳳樓

以蒲桃為酒又有紫酒青酒不知其所釀而味尤美  
其食粳沃以蜜粟沃以酪其衣布帛有園圃花木俗  
喜鬼神而好佛聖天居處常以紫衣僧五人列侍其  
年號同慶二十九年其國東南曰銀州廬州湄州其  
南千三百里曰至州云漢張騫所窮河源出于闐而  
山多玉者此也其河源所出至于闐分為三東曰白  
玉河西曰綠玉河又西曰烏玉河三河皆有玉而色  
異每歲秋水涸國王撈玉于河然後國人得撈玉

高昌國

王明清揮麈前錄曰太平興國六年詔遣供奉官王德延殿前承旨白勲使高昌雍熙元年四月延德等叙其行程來上云初自夏州歷玉亭鎮次歷黃羊平其地平而產黃羊度沙磧無水行人皆載水凡二日次都囉囉族漢人過者遺以財貨謂之打當次歷茅家啁子族臨黃河以羊皮為囊吹氣實之浮于水或以橐駝牽木柂而渡次歷茅女王子開道族行入六

窠沙沙深三尺馬不能行行者皆乘橐駝不育五穀  
沙中生草名登相收之以食次厯樓子山無居人行  
沙磧中以日為占旦則背日暮則向日日下則止又  
行望月亦如之次厯臥羊梁劾時族地有都督山唐  
回鶻之地次厯太子大蟲族接契丹界人衣尚錦繡  
毳用金銀馬乳釀酒飲之亦醉次厯屋地目族蓋達  
爾罕裕悅王之子次至達爾罕裕悅王子族此九族達勒  
尤尊者次厯伊喇王子族有合羅州唐回鶻公主所

居之地城基尚在有湯泉池傳曰契丹舊為回鶻牧羊達靺舊為回鶻牧牛回鶻徙甘州契丹達靺遂各爭長攻戰次歷何墩族經馬鬣山望鄉嶺嶺上石庵有李陵題字處次歷格囉美源西方百川所會極望無際鷗鷺鳬雁之類甚衆次至托邊城亦名李僕射城城中首領號通天大王次歷小石川次歷伊州州將陳氏其先自唐開元二年領州凡數十世唐時詔勅尚在地有野蠶生苦參上可為綿帛有羊尾大而



不能走尾重者三斤小者一斤肉如熊白而甚美又有礪石剖之得賓鐵謂之契鐵石又有胡桐樹經雨即生胡桐律次厯益都次厯納職城在大患鬼魅磧之東南望玉門關甚近地無水草載糧以行凡三日至思谷曰避風驛本俗試出詔押御風風乃息凡八日至澤田寺高昌聞使至遣人來迎次厯寶莊又厯六鍾乃至高昌即西川也其地南距于闐西南距大食波斯西距西天步露沙雪山葱嶺皆數千里地無

雨雪而極熱每盛暑人皆穿地為穴以處飛鳥羣萃  
河濱或飛起即為日氣所鑠墜而傷翼屋室覆以白  
堊開寶二年雨及五寸即廬舍多壞有水出金嶺導  
之周繞國城以溉田園作水碓地產五穀惟無蕎麥  
貴人食馬餘食牛及鳬雁樂多塋篋出貂鼠白氍繡  
文花藥布俗多騎射婦人戴油帽謂之蘇幕遮用開  
元七年歷以三月九日為寒食餘二社冬至亦然以銀  
或鍮為筒貯水激以相射或以水交潑為戲謂之壓

陽氣去病好游賞行者必抱樂器佛寺五十餘區皆  
唐朝所賜額寺中有大藏經唐韻玉篇經音等居民  
春月多游羣聚邀樂于其間遊者馬上持弓矢射諸  
物謂之禳灾有勅書樓藏唐太宗明皇御札詔勅緘  
鎖甚謹後有摩尼寺波斯僧各持其法佛經所謂外  
道者也統有南突厥北突厥大衆慰小衆慰樣磨割  
祿黠戛司末蠻格哆族預龍族之名甚衆國中無貧  
民絕食者共振之人多壽考率百餘歲絕無夭死時

四月獅子王避暑于北廷以其舅阿多于越守國先遣人致意于延德曰我王舅也使者拜我乎延德曰持朝命而來禮不當拜阿多裕悅後數日始出相見然其禮頗恭獅子王邀延德至其北廷歷交河州凡六日至金嶺口寶貨所出又兩日至漢家寨又五日上金嶺溫嶺即多雨雪上有龍王刻石記云小雪山也嶺上有積雪行人皆服毛罽度嶺一日至北廷憇高臺寺其王烹羊馬以具饌尤豐潔地多馬王及太

后太子各養馬牧放于平川中彌亘數百里以毛色  
分別為羣莫知其數北廷川廣長數千里鷹鷂鵠鵲  
之所生多美草下生花砂鼠大如鸛鷩禽捕食之至  
七日見其王及王子侍者皆東向拜受賜傍有持磬  
者擊以節拜王聞磬聲乃拜既而王之兒女親屬皆  
出羅拜以受賜遂張樂飲宴為優戲至暮明日汎舟  
于池中池四面作鼓樂又明日遊佛寺曰應運泰寧  
之寺貞觀十四年造北廷北山中出礪砂山中常有

烟氣湧起而無雲霧且又光皎若炬照見禽鼠皆赤  
采礪砂者著木底鞵若皮為底者即焦下有穴生青  
泥出穴外即變為砂石土人取以治皮城中多樓臺  
草木人白晢端正性工巧善治金銀銅錢為器及攻  
玉善馬直絹一疋其駕馬充食者纔直一丈貧者皆  
食肉西抵安西即唐之西境七月令延德先還其國  
其王九月始至亦聞有契丹使來屑缺以銀葉蔽之  
謂其王曰聞漢遣使入達靺而道出王境誘王窺邊

宜早送至達靼無使久留因曰高昌本漢土漢使來  
覘視封域將有異圖王當察之延德偵知其語因謂  
王曰契丹數不順中國今乃反間我欲殺之王固勸  
乃止自六年五月離京師七年四月至高昌所歷以  
詔賜諸番君長襲衣金帶繒帛八年春與其謝恩使  
凡百餘人復循舊路而還雍熙元年四月至京師延  
德初至達靼之境頗見晉末陷契丹者之子孫咸相  
率遮迎獻飲食問其鄉里親戚意甚悽感留旬日不

得去延德之自叙云 契丹國志曰高昌都交河漢  
車師前王庭也四面多大山晉以其地為高昌郡地  
石磧氣候溫暖厥土良沃麥一歲再熟宜蠶有草名  
羊刺其上生蜜味甚佳引水溉田出赤鹽甚美俗事  
天神兼信佛法其官有八長史五將軍又有侍郎校  
郎主簿從事階位相次契丹時一年一次朝貢進獻  
大珠乳香斜合里皮褐里絲等亦有互市其國王親  
與北主評價 湯屋畫鑒曰高昌國畫用金銀箔子



及朱墨點點如雨銷灑在紙上畫翎毛如中國花草亦佳

盟熱

以下補

松漠紀聞曰盟熱者國最小不知其始所居後為契丹徙置黃龍府南百餘里曰賓州州近混同江即古之粟末河黑水也部落雜處以其族類之長為千戶統之契丹女真貴游子弟及富家兒月夕被酒則相率携尊馳馬戲飲其地婦女聞其至多聚觀之間令

坐與之酒則飲亦有起舞謳歌以侑觴者飲食皆以木器好真蠱他人欲其不驗者云三彈指于器上則有毒自解亦間有遇毒而斃者族多李姓

韃靼

建炎以來朝野雜記曰韃靼之先與女真同種蓋皆韃靼之後也其國在元魏齊周之時稱勿吉至隋稱靺鞨也直長安東北六千里東瀕海離為數十部部有黑水白山等名白山本臣高麗唐滅高麗其遺人

迸入渤海惟黑水完強及渤海盛皆役屬之後為奚契丹所攻部族分散其居混同江之上者曰女真乃黑水遺種也其居陰山者自號為韃靼唐末五代常通中國太祖太宗朝各再入貢皆道靈武而來及繼遷叛命遂絕不通因為契丹所服役韃靼之人皆勇悍善戰其近漢地者謂之熟韃靼尚能種秋稼以平底瓦釜煮而食之其遠者謂之生韃靼止以射獵為生無鎧甲矢用骨鏃而已蓋以地不產鐵也契丹雖

通其和市而鐵禁甚嚴及金人得河東廢鐵錢由是秦晉鐵錢皆歸韃靼韃靼得之遂大作軍器而國以益強方金人盛時韃靼歲時入貢金人置河東招討使以統隸之衛王既立韃靼特穆津始自稱青吉斯皇帝

遼境四至

附

契丹國志曰東南至新羅國西以鴨綠江東八里黃土嶺為界至保州一十一里次東南至五節度熟

女真部族共一萬餘戶皆雜處山谷尤精弋獵有屋  
居舍門皆于山牆下闢之耕鑿與渤海人同無出租  
賦或遇北主征伐各量差下戶充兵馬回各逐使歸  
本處所產人參白附子南星茯苓松子豬苓白皮等  
物並係契丹樞密院所轄差契丹或渤海人充節度  
管押其地南北七百餘里東西四百里西北至東京  
五百餘里又次東南至生女真國不屬契丹所管  
其地東西八百餘里南北一千餘里居民雜處山林

耕牧屋宇與熟女真五節度同然無君長首領統押  
精于騎射今古以來無盜賊詞訟之事任意遷徙多  
者百家少者三兩家而已不與契丹爭戰或居民等  
相率以金帛布黃蠟天南星人參白附子松子蜜等  
諸物入貢北蕃或只令于邊上買賣訖卻歸本國契  
丹商賈人等就入其國買賣亦無所礙契丹亦不以  
為防禦西至東京二百餘里東北至女真國西南至  
熟女真國界東至新羅國界東北不知其極居民星

宇耕鑿言語衣裝與熟女真國並同亦無君長所管  
精于騎射前後屢與契丹為邊患契丹亦設防備南  
北二千餘里沿邊創築城堡般運糧草差撥兵甲屯  
守征討三十年來深為患耳南界西南至東京六百  
里又東北至烏舍國阿里瑪國布古魯特等國每國  
各一萬餘戶西南至生女真國界衣裝耕種屋宇言  
語與女真人異契丹樞密院差契丹或渤海人充逐  
國節度使管押然不出征賦兵馬每年惟貢進大馬


蛤珠青鼠皮貂鼠皮膠魚皮蜜蠟之物與北蕃人往來買賣西至上京四千餘里 正界北至鐵離國南至阿里瑪等國界居民言語衣裝屋宇耕養稍通阿里瑪等國無君長皆雜處山林不屬契丹管押亦不與契丹爭戰惟以大馬蛤珠鷹鵠青鼠貂鼠等皮膠魚皮等物與契丹交易西南至上京五千餘里 次東北至靺鞨國東北與鐵離國為界無君長統押微有耕種春夏居屋宇中秋冬則穿地為洞深可數丈



居之以避其寒不與契丹爭戰惟以細鷹鵞鹿細白  
布青鼠皮大馬膠魚皮等與契丹交易西南至上京  
四千餘里西北至蒙古國無君長所管亦無耕  
種以弋獵為業不常其居每四季出行惟逐水草所  
食惟肉酪而已不與契丹爭戰惟以牛羊馳馬皮毳  
之物與契丹交易南至上京四千餘里又次北至  
伊濟國無君長首領管押凡事並與蒙古國同甲寅  
歲曾率衆入契丹國為盜聖宗命駙馬都尉蕭從欲

統兵大破其國爾後不復為盜惟以牛羊駝馬皮毳之物與契丹為交易東南至上京五千餘里又次西北至博和哩國又次北近西至韃靼國各無君長每部族多者三二百家少者五七十家以部族內最富豪者為首領不常厥居逐水草以弋獵為業其婦人皆精于騎射常與契丹爭戰前後契丹主命親近為西北路兵馬都統率番部兵馬十餘萬防討自契丹建國以來唯此二國為害如暫安靜以牛羊駝馬

皮毳為交易東南至上京六千餘里 西近北至生  
吐蕃國又西至党項突厥等國皆不為契丹國害亦  
不進貢往來蓋以熟吐渾突厥党項等部族所隔東  
南至雲州三千里



遼史拾遺卷十八

欽定四庫全書

史部

遼史拾遺卷二十九

詳校官庶吉士臣瑚圖禮

總校官庶吉士臣何思鈞

校對官助教臣胡子襄

謄錄監生臣李樗

欽定四庫全書

遼史拾遺卷十九

錢塘厲鶚撰

列傳第一

后妃

陳大任遼史后妃傳

鶚案金史完懷英傳曰承安二年召為翰林學士承  
旨泰和元年增修遼史詔分紀志列傳致仕後章宗

詔直學士陳大任繼成遼史云

太祖淳欽皇后舒魯氏

契丹國志曰后任智用權立中子德光在其國稱太  
后左右有桀黠者后輒謂曰為我達語于先帝至墓  
所即殺之前後所殺以百數最後平州人趙思溫當  
往思溫不行太后曰汝事先帝親近何為不行對曰  
親近莫如后后行臣即繼之太后曰我非不欲從先  
帝于地下顧諸子幼弱國家無主不得往耳乃斷一

脫置墓中思溫亦得免 胡嶠陷北記曰世宗烏雲  
及舒魯后戰于沙河舒魯兵敗而北烏雲追至獨樹  
渡遂囚舒魯于撲馬山

太宗靖安皇后蕭氏

契丹國志曰太宗南入大梁舒魯后專秉國事后無  
所預弟蕭翰性殘忍后每戒其多殺

世宗妃甄氏

契丹國志曰甄后廟碑翰林學士李昉撰



景宗睿知皇后蕭氏

東都事略曰隆緒自稱天輔皇帝尊母燕燕為皇太后燕燕姓蕭氏宰相思溫之女有機謀善馭左右大臣多得其死力先是蕃民毆漢人死者償以牛馬漢人則斬之仍以其親屬為奴婢燕燕一以漢法論每戎馬南入親被甲督戰及通和亦出其謀然天性殘忍多殺戮與耶律隆運通遣人縊殺其妻又幸醫工特哩哀有私議其醜者輒殺之隆緒畏莫敢言既卒

謚曰宣獻年五十七 契丹國志曰自南北通和後  
契丹多在中京武功殿聖宗居之文化殿太后居之  
好華儀而性無檢束每宴集有不拜不拱手者惟后  
願固盟好而年齒漸衰宰相耶律隆運專權有辟陽  
侯之幸寵榮終始朝臣莫及焉其後歸政于帝未踰  
月而崩 鶚案唐知史稱賢后隆運辟陽之幸其說  
近誣

聖宗仁聖皇后蕭氏

東都事畧曰齊天皇后平州節度使蕭烏延之女耶律隆運之甥有容色隆緒寵愛異之事其姑燕燕甚謹燕燕亦以隆運故深愛之契丹國志曰齊天后事承天太后尤謹承天上仙齊天預政權勢日甚置宮闈司補官屬出教令生辰曰順天節后善琵琶工燕文顯李文福元妃言其事聖宗不之信又為卷書投聖宗寢帳中聖宗得之曰此必元妃所為也命焚之鷄案李文福東都事略作李有福

聖宗欽哀皇后蕭氏

契丹國志曰后姊秦國夫人早年嫠居后見長沙王名謝嘉努沈偉美姿容為殺其妃而以秦國妻之妹晉國夫人喜戶部侍郎耿元吉貌美后從晉國之請亦為殺其妻以晉國妻之太后幽于慶州數年帝聽講報恩經感悟迎回太后

聖宗芳儀李氏

補

王銍默記曰趙至忠虞部自契丹歸朝仕遼為翰林

學士著北廷雜記言聖宗芳儀李氏江南李景女初  
嫁供奉官孫某為武彊都監妻女皆為聖宗所獲封  
芳儀生公主一人晁補之為北都教官因覽此書而  
悲之與顏復長道作芳儀曲云金陵宮殿春霏微江  
春花發鷓鴣飛風流國主家千口十五吹簫粉黛稀  
蒲堂詩酒皆詞客拭汗爭看平叔白後庭一曲時事  
新揮淚臨江悲故國令公獻籍朝未央敕書築第優  
降王魏俘曾不輸織室供奉一官奔武彊秦淮潮水

鍾山樹塞北江南易懷土雙燕清秋夢柏梁吹落天  
涯猶並羽相隨未是斷腸悲黃河應有卻還時寧知  
翻手明朝事咫尺千山不可期蒼黃三鼓溲沱岸良  
人白馬今誰見國亡家破一身存薄命如雲信流轉  
芳儀加我名字新教歌遣舞不由人采珠拾翠衣裳  
好深紅暗盡驚飛塵陰山射虎邊風急嘈雜琵琶酒  
闌泣無言數徧天河星只有南箕近鄉邑當年千指  
渡江來千指不知身獨哀中原骨肉盡零落黃鵠寄

意何當回生男自有四方志女子那知出門事君不  
見李君椎髻泣窮邊丈夫漂泊猶堪憐余嘗游廬山  
見李主有國時修真風觀皆宮人施財刊姓氏于碑  
有太寧公主永嘉公主二人皆景女不知芳儀者孰  
是也 鶚案史公主表聖宗十三女賽格封金鄉公  
主李氏生當即是芳儀

道宗宣懿皇后蕭氏

王鼎焚椒錄曰懿德皇后蕭氏為北面官南院樞密

使惠之少女母耶律氏夢月墜懷已復東升光輝照  
爛不可仰視漸升中天忽為天狗所食驚寤而后生  
時重熙九年五月己未也母以語惠惠曰此女必大  
貴而不得令終且五日生女古人所忌命已定矣將  
復奈何后幼能誦詩旁及經子及長姿容端麗為蕭  
氏稱首皆以觀音目之因小字觀音二十二年今上  
在青宮進封燕趙國王慕后賢淑聘納為妃后婉順  
善承上意復能歌詩而彈箏琵琶尤為當時第一由



是愛幸遂傾後宮及上即位以清寧元年十二月戊子冊為皇后方出閤升坐扇開簾卷忽有白練一段自空吹至后褥位前上有三十六三字后問此何也左右曰此天書命哈屯領三十六宮也后大喜二年八月上獵秋山后率妃嬪從行在所至伏虎林命后賦詩后應聲曰威風萬里壓南邦東去能翻鴨綠江靈怪大千俱破膽那教猛虎不投降上大喜出示羣臣曰皇后可謂女中才子次日上親御弓矢射獵

有虎突林而出上曰朕射得此虎可謂不媿后詩一  
發而殪羣臣皆呼萬歲是歲十一月羣臣上皇帝尊  
號曰天祐皇帝后曰懿德皇后三年秋上作君臣同  
志華夷同風詩后應制屬和曰虞廷開盛軌王會合  
奇琛到處承天意皆同捧日心文章通鹿麤聲教薄  
雞林大寓看交泰應知無古今明年后生皇子濬皇  
太叔重元妃入賀每顧影自憐流目送媚后語之曰  
貴家婦宜以莊臨下何必如此妃銜之歸罵重元曰

汝是聖宗兒，豈和斯不若？使教坊奴得以哈屯加我。  
汝若有志，當除此帳筥，捷此婢。于是重元父子合定  
叛謀。于九年七月，駕幸灤水，聚兵作逆。須臾，軍潰。父  
子伏誅，而討平此亂。則知北樞密事趙王耶律伊遜  
與有功焉。尋進南院樞密使，威權震灼，傾動一時。唯  
后家不冒相下。伊遜每為怏怏。及咸雍初，皇子濬冊  
為皇太子，益復蓄奸為圖。后計矣。后常慕唐徐賢妃  
行事，每于當御之夕，進諫得失國俗。君臣尚獵，故有

四時巴納上既擯聖藻而尤長弓馬往往以國服先  
驅所乘馬號飛電瞬息百里常馳入深林邃谷扈從  
求之不得乃上疏諫曰妾聞穆王遠駕周德用衰太  
康佚豫夏社幾屋此游畋之往戒帝王之龜鑑也頃  
見駕幸秋山不閑六御特以單騎從禽深入不測此  
雖威神所屆萬靈自為擁衛倘有絕羣之獸果如東  
方所言則清中之豕必敗簡子之駕矣妾雖愚闇竊  
為社稷憂之惟陛下尊老氏馳騁之戒用漢文吉行

之旨不以其言為牝雞之晨而納之上雖嘉納心頗厭遠故咸雍之末遂稀幸御后因作詞曰回心院被之管絃以寓望幸之意埽深殿閉久金鋪暗游絲絡網塵作堆積歲青苔厚堦面埽深殿待君宴拂象牀憑夢借高唐敲壞半邊知妾臥恰當天處少輝光拂象牀待君王換香枕一半無雲錦為是秋來轉展多更有雙雙淚痕滲換香枕待君寢鋪翠被羞殺鴛鴦對猶憶當時叫合歡而今獨覆相思塊鋪翠被待君

睡裝繡帳金鈎未敢上解卻四角夜光珠不教照見  
愁模樣裝繡帳待君貺疊錦裯重重空自陳只願身  
當出玉體不願伊當薄命人疊錦裯待君臨展瑤席  
花笑三韓碧笑妾新鋪玉一牀從來婦歡不終夕展  
瑤席待君息剔銀燈須知一樣明偏是君來生彩暈  
對妾故作青熒剔銀燈待君臨熬熏爐能將孤悶  
蘇若道妾身多穢賤自霑御香香徹膚熬熏爐待君  
娛張鳴箏恰恰語嬌鶯一從彈作房中曲常和窗前

風雨聲張鳴箏待君聽時諸伶無能奏演此曲者獨  
伶官趙惟一能之而宮婢單登故重元家婢亦善箏  
及琵琶每與惟一爭能怨后不知已后乃召登對彈  
四旦二十八調皆不及后單媿恥拜服于時上嘗召  
登彈箏后諫曰此叛家婢女中獨無豫讓乎安得輕  
近御前因遣直外別院登深怨嫉之而登妹清子嫁  
為教坊朱頂鶴妻方為耶律伊遜所暱登每向清子  
誣后與惟一淫通伊遜俱知之欲乘此害后以為不

足證實更命他人作十香淫詞用為誣案云青絲七  
尺長挽出內家裝不知眠枕上倍覺綠雲香紅綃一  
幅強輕闌白玉光試開胸採取尤比顫酥香芙蓉失  
新艷蓮花落故妝兩般總堪比可似粉腮香螭蟻那  
足並長須學鳳凰昨宵歡臂上應惹領邊香和羹好  
滋味送語出宮商定知郎口內含有煖甘香非關蕪  
酒氣不是口脂芳卻疑花解語風送過來香既摘上  
林藥還親御苑桑歸來便攜手纖纖春筍香鳳韉拋



合縫羅襪卸輕霜誰將煖白玉雕出軟鉤香解帶色  
已戰觸手心愈忙那識羅裙內消魂別有香咳唾千  
花釀肌膚百和裝元非噉沈水生得滿身香伊遜陰  
屬清子使登乞后手書登時雖外直常得見后后善  
書登給后曰此宋國多爾吉所作更得御書便稱二  
絕后讀而喜之即為手書一紙紙尾復書已所作懷  
古詩一絕云宮中只數趙家妝敗雨殘雲誤漢王惟  
有知情一片月會窺飛燕入昭陽登得后手書持出

與清子云老婢淫案已得況主汙性忌早晚見其白練挂粉脰也伊遜已得書遂擣詞命登與朱頂鶴赴北院陳首伶官趙惟一私侍懿德皇后有十香淫詞為證伊遜乃密奏上曰太康元年十月二十三日據外直別院宮婢單登及教坊朱頂鶴陳首本坊伶官趙惟一向要結本坊入內承直高長命以彈箏琵琶得召入內沐上恩寵乃輒干冒禁典謀侍懿德皇后御前忽于咸雍六年九月駕幸木葉山惟一公稱有

懿德皇后旨召入彈箏于時皇后以御製回心院曲  
十首付惟一入調自辰至酉調成皇后向簾下目之  
遂隔簾與惟一對彈及昏命燭傳命惟一去官服著  
綠巾金抹額窄袖紫羅衫珠帶烏鞞皇后亦著紫金  
百鳳衫杏黃金縷裙上戴百寶花髻下穿紅鳳花鞞  
召惟一更入內帳對彈琵琶命酒對飲或飲或彈至  
院鼓三下勅內侍出帳登時當直不復聞帳內彈飲  
但聞笑聲院鼓四下后喚登揭帳曰惟一醉不起可

為我叫醒登叫惟一百通始為醒狀乃起拜辭后賜金帛一篋謝恩而出其後駕還雖時召見不敢入帳后深懷思因作十香詞賜惟一惟一持出誇示同官朱頂鶴朱頂鶴遂手奪其詞使婦清子問登登懼事發連坐乘暇泣諫后怒痛笞遂斥外直但朱頂鶴與登共悉此事使含忍不言一朝敗壞安免株坐故敢首陳乞為轉奏以正刑誅臣惟皇上以至德統天化及無外寡妻匹婦莫不刑于今宮帳深密忽有異言

其有關治化良非渺小故不忍隱諱輒據詞并手書  
十香詞一紙密奏以聞上覽奏大怒即召后對詰后  
痛哭轉辨曰妾托體國家已造婦人之極況誕育儲  
貳近且生孫兒女滿前豈忍更作淫奔失行之人乎  
上出十香詞曰此非汝作手書更復何辭后曰此宋  
國多爾吉所作妾即從單登得而書賜之耳且國家  
無親蠶事妾作那得有親桑語上曰詩正不妨以無  
為有如詞中合縫鞞亦非汝所著為宋國服耶上怒

甚因以鐵骨朶擊后后幾至殞即下其事使參知政  
事張孝傑與伊遜窮治之伊遜乃繫械惟一長命等  
訊鞫加以釘灼盪錯等刑皆為誣服獄成將奏樞密  
使蕭惟信馳語伊遜孝傑曰懿德賢明端重化行宮  
帳且誕育儲君為國大本此天下母也而可以叛家  
仇婢一語動搖之乎公等身為大臣方當照燭奸宄  
洗雪冤誣烹滅此輩以報國家以正國體奈何欣然  
以為得其情也公等幸更為思之不聽遂具獄上之

上猶未決指後懷古一詩曰此是皇后罵飛燕也如  
何更作十香詞孝傑進曰此正皇后懷趙惟一耳上  
曰何以見之孝傑進曰宮中只數趙家妝惟有知情  
一片月是二句中包含趙惟一三字也上意遂決即  
日族誅惟一并斬長命勅后自盡時皇太子及齊國  
諸公主咸被髮流涕乞代母死上曰朕親臨天下臣  
妾億兆而不能防閑一婦更何施面目覲然南面乎  
后更乞面見汗一言而死不許后乃望帝所而拜作

絕命詞曰嗟薄祐兮多幸羌作儼兮皇家承昊穹兮  
下覆近日月兮分華托後鉤兮凝位忽前星兮啓曜  
雖勞累兮黃牀庶無罪兮宗廟欲貫魚兮上進乘陽  
德兮天飛豈禍生兮無朕蒙穢惡兮宮闈將剖心兮  
自陳冀迴照兮白日寧庶女兮多慙過飛霜兮下繫  
顧子女兮哀賴對左右兮摧傷共西曜兮將墜忽吾  
去兮椒房呼天地兮慘悻恨今古兮安極知吾生兮  
必死又焉愛兮旦夕遂閉宮以白練自經上怒猶未



解命裸后屍以葦席裹還其家春秋三十有六正符  
白練之語聞者莫不寃之皇太子投地大呼曰殺吾  
母者耶律伊遜也他日不門誅此賊不為人子伊遜  
遂謀害太子無虛日矣嗟嗟自古國家之禍未嘗不  
起于纖微也曷觀懿德之變固皆成于伊遜然其始  
也由于伶官得入宮帳其次則叛家之婢使得近左  
右此禍之所由生也第伊遜凶慘無匹固無論而孝  
傑以儒業起家必明于大義者使如惟信直言毅然

諍之后必不死后不死則太子可保無恙而上亦何  
慙于少恩骨肉哉乃亦昧心同聲自保祿位使母后  
儲君與諸老成一旦皆死于非辜此史冊所書未有  
之禍也二人者可謂罪通于天者乎然懿德所以取  
禍者有三焉曰好音樂與能詩善書耳假令不作回  
心院曲則十香詞安得誣出后手乎至于懷古一詩  
天實為之而月食飛練先命之矣

天祚皇后蕭氏

契丹國志曰山金司之禍后并彼擒尼瑪哈納為次室  
其後耶律伊都雲中起兵烏舍誅伊都并及于后烏  
舍回至燕山請罪于尼瑪哈曰蕭氏忍死以從兄者將  
有待于今日也今見事無成恐或不利于兄且兄橫  
行天下萬夫莫當此人帷幄之間可以寸刃害兄于  
不測矣以愛兄故已擅殺之尼瑪哈起而謝之既而泣  
下

天祚元妃蕭氏

張滙金節要曰尼瑪哈之妻乃遼主天祚元妃 鷄案  
天祚皇后元妃史俱云從西狩以疾亡而二書所說  
不同如此豈陳大任以金人修遼史故諱之耶

列傳第二

宗室

義宗貝

五代會要曰長興元年東丹王托雲率蕃官四十餘  
人馬百匹自登州汎海內附明宗賜姓東丹名慕華

授光祿大夫檢校太保安東都護兼御史大夫上柱  
國渤海郡開國公食邑一千五百戶充懷化軍節度  
瑞慎等州觀察使二年九月復賜姓李名贊華五  
代史曰契丹好飲人血托雲左右姬妾多刺其臂吮  
之其小過輒挑目剗灼不勝其毒然性喜賓客好飲  
酒工畫頗知書其自契丹歸中國載書數千卷樞密  
使趙延壽每假其異書醫經皆中國所無者又曰  
唐莊宗遇弒後後宮皆散走朱守殷入宮選得三十

餘人號國夫人夏氏以嘗幸于莊宗守殷不敢留明  
宗立悉放莊宗時宮人還其家獨夏氏無所歸乃以  
河陽節度使夏魯奇同姓也因以歸之復嫁契丹李  
贊華冊府元龜曰安巴堅長子東丹王托雲歸國  
明宗賜姓李名贊華出鎮滑州在鎮多行不法頃之  
入覲乞留闕下明宗許之復遣就第問所欲贊華附  
奏曰臣願為許州節度使明宗欲從之樞密使范延  
光以為不可乃止明宗促令歸滑贊華謂使者曰若

須令赴舊地當自裁爾使者以聞明宗不悅召而證之贊華曰臣不言自裁曾言乞削髮為僧使者引統軍李從晷為證贊華以手畫空曰使者之言如水上畫字何可據耶明宗優容之清異錄曰契丹東丹

王托雲買巧石數峰目為空青府堯山堂外紀曰

東丹王有文才博古今其帆海奔唐載書數千卷習舉子業每通名刺云鄉貢進士黃居難字樂地以擬白居易字樂天也張齊賢洛陽縉紳舊聞記曰晉

朝太子少師李公肅受命護東丹王喪柩歸北遣回  
賜名馬百餘匹別賜馳馬百餘頭衣服器皿稱是

宣和畫譜曰李贊華好畫多寫貴人酋長至于袖弓  
挾彈牽黃臂蒼服用皆縵胡之纓鞍勒率皆瑰奇不  
作中國衣冠亦安于所習者也然議者以為馬尚豐  
肥筆乏壯氣其確論歟今御府所藏十有五雙騎圖  
一獵騎圖一雪騎圖一番騎圖六人騎圖二千角鹿  
圖一吉首並驅圖一射騎圖一女真獵騎圖一江



少虞皇朝類苑曰祕閣有東丹王千角鹿圖東丹王歸中國賜姓李名贊華亦能為五言詩其子托雲亦善丹青千角鹿出北方所畫誠妙筆也 周密志雅

堂雜鈔曰王介石有東丹王贊華所畫番部行程圖遼東志曰顯陵在醫巫閭山莖遼東丹人皇王托雲世宗以人皇王愛醫巫閭山水奇秀因莖焉山形掩抱六重于中作影殿制度宏麗

遼史拾遺卷十九